

Silaannakkut angallanneq pillugu inatsisip allanngortinneqarnissaa pillugu inatsisip Kalaallit Nunaannut atuutilersinneqarnissaanut peqqussummik Namminersorlutik Oqartussat akuersissuteqarnissaat pillugu Inatsisartut aalajangiiffigisassaattut siunnersuut

(Ineqarnermut Attaveqaasersuutinullu Naalakkersuisoq)

Saqqummiussissut

(Ineqarnermut Attaveqaasersuutinullu Naalakkersuisoq)

Siullermeerneqarnera

Aalajangiiffigisassatut siunnersuutitigut matumuunakkut Naalakkersuisut kissaatigaat, Silaannakkut angallanneq pillugu inatsisip allanngortinneqarnissaa pillugu inatsisip Kalaallit Nunaannut atuutilersinneqarnissaanut peqqussummik Kalaallit Nunaata akuersissutigissagaa.

Siunnersuut tallimanik imaqarpoq:

- Havarikommissionip misissuinissamat pisussaaffia
- Havarikommissionip oqartussaqaarfittut arlaannaannulluunniit attuumassuteqaangitsutut ingerlanissaata qulakkeerneqarnissaa
- Dronenut suliaasaqaarfimmi piginnaatitsissutinik nalinginnaasumik tunniussisinnaaneq
- Digitalikkut aaqqiissutit aallaavigalugit sulianik eqaatsumik suliaqarneq
- Atortutigut sunniuneqartussaangitsunik silaannakkut angallanneq pillugu inatsimmi teknikkikkut, oqaatsitigullu allannguinerit

Havarikommissionip misissuinissamat pisussaaffianik annertusaanissamik, peqqussummik siunnersuut siunertaqarpoq. Siunnersuuteqarnikkut ajutoornerit ajorluinnartut imaluunniit ilungersunartunik ajutoornernik kinguneqartut tamaasa ilaatinneqalersillugit, misissuinissamat pisussaaffik annertusineqassaaq. Uanili ajutoornerni faldskærmit, drageflyt, glideskærmit imaluunniit paratrikenik taaneqartartut ajutoornerni ilaatillugit ilanngunnagit.

Tullertut Havarikommissionip oqartussaqaarfittut arlaannaannulluunniit attuumassuteqaangitsutut ingerlanissaa qulakkeerneqassaaq.

Dronet inuussutissarsiutaalersimanerinit atatillugu aamma siunnersuutigineqarpoq, silaannakkut angallannerup isumannaallisarneqarneranut sunniuteqassangitsoq nalilerneqarpat, dronenut suliaasaqaarfimmi piginnaatitsissutinik oqartussanut allanut, kattuffinnut namminersortunut, suliffeqaarfinnut aamma sulianut ilisimasalinnut tunniussisoqarsinnaalersillugu silaannakkut angallanneq pillugu inatsimmi tunngavimmik pilersitsisoqassasoq. Suliat kalaallisut ingerlanneqarsinnaalernissaannut periarfissiissasoq nalilerneqarpoq.

Sunniuteqarluartumik sulianik ingerlatsisoqarnissaa pitsaanerpaamik tunngavissinniarlugu, silaannakkut angallanneq tamaat eqqarsaatigalugu innuttaasut aamma suliffeqaarfiit digitalimik

aaqqissuussinernik, Trafikstyrelsi atugassanngortitaanik aallaaviusumik atuinissaat pillugu transportministeri malittarisassanik aalajangersaanissamut piginnaatinneqarnissaanik siunnersuut siunertaqarpoq. Immikkut ittumik pisoqartillugu innuttaasup imaluunniit suliffeqarfiup digitalikkut aaqqiissutinik atuinnginnissaanik malittarisassanik aalajangersaanissamut tunngavissiisoqarnissaa ilutigisaanik qulakkeerneqassaaq.

Naggataatigut atortutigut sunniuneqartussaangitsunik silaannakkut angallanneq pillugu inatsimmi teknikkikkut, oqaatsitigullu allannguisoqassasoq siunnersuutitigut siunnersuutigineqarpoq. Kiisalu Kalaallit Nunaannut atuuttussannik silaannakkut angallanneq pillugu inatsimmi teknikkikkut iluarsissuteqarnissaaq.

Inatsimmut allannguutissaaq Folketingimit akuersissutigineqartoq eqqarsaatigalugu, *Silaannakkut angallanneq pillugu inatsisip allanngortinneqarnissaa pillugu inatsisip Kalaallit Nunaannut atuutilersinneqarnissaanut peqqussutissatut siunnersuummi* allannguutissaaq ataasiinnaq ilaatinneqanngilaq. Silaannakkut angallanneq pillugu inatsisip EU-mi malittarisassanut naapertuunnissaata qulakkeernissaa siunertaralugu taanna allanngortinneqarpoq. Taamaattumik allannguut Kalaallit Nunaannut attuumassuteqanngilaq.

Taamatut oqaaseqarlunga siunnersuut Inatsisartunit kajumittumik suliassanngorlugu ingerlateqqippara.